

au fujet de la maladie, & à ces imposteurs qui auoient maintenu que Robert le Coq les auoit si confidemment aduertis des magies noires & des fortileges execrables dont nous les faisons tous mourir. Il ne fut pas bien difficile de refuter ces calomnies, puis que celui qu'on disoit auoir esté l'vnique source de tous ces bruits n'estant pas mort, comme ils auoient iugé, mais ayant recouré vne [30] pleine santé, pût démentir tous ceux qui maintenoient auparauant l'auoir entendu de sa bouche. Mais quoy? le mensonge l'emporte au dessus de la vérité, les calomniateurs trouuēt plus de créance que celui qui nous iustifie. Le diable passe bien plus outre, car la maladie de ce ieune François ayant tenu assez long temps l'esprit de plusieurs en balance, nous voyant enuoloppez dans la mesme misere: lors qu'ils virent en santé celui que tous les hommes eussent iugé pour mort, il leur vint en pensée que tout cela n'auoit esté que collusion avec la maladie, & qu'ayant intelligence avec elle, nous en auions disposé de la sorte, pour leur ietter de la poussiere aux yeux. Quoy qu'il en soit, on crie publiquement au meurtre, mais les demons font comme des tonnerres, qui font plus de bruit que de mal; car toutes ces menaces n'ont pas eu beaucoup d'effect. Nous viuons, Dieu mercy, tous pleins de vie & de santé. Il est bien vray que les croix ont esté abbattues de dessus nos maisons, qu'on est entré la hache en main dans nos cabanes pour y faire quelque mauuais coup; [31] on a, dit-on, attendu sur les chemins aucuns des nostres en intention de les tuer; on a leué la hache sur les autres, & ramené le coup iusques à vn doigt pres de leur teste nue; les Crucifix qu'on portoit aux malades nous ont esté arrachez